




Wie die herren ze kirchen giengen.

XXXI. Auentiure.

**M**

ir chvolint so die ringe. so sprach Volker.  
 ia wän die nacht vns welle. no niht wern mer.  
 ich chivofes von dem lofte. es ist vil schiere tac.  
 do wachten si der manigen. der noch slafende lach.



Do erschein der lichte morgen. den gesten inden sal.  
Hagen begunde vragē. die rechen vberal.  
ob si zem monster wolden. zo der messe gan.  
nach siten kristenlichen. man vil lotten began.

Si sungen ungeliche. das da vil wol schein.  
kristen vnt heiden. die zogen niht ekein.  
do wolden zo der chirchen. die Gunthers man.  
si warn von den betten. al geliche no gestan.


Do näten sich die rechen. in also goot gewant.  
das nie helde mere. in deheines kuniges lant.  
bezer kleider brahten. das was Hagene leit.  
er sprach ia solt ir degene. hie tragen anderiv kleit.

Nu sint ir doch genvogen. diu märe wol bechant.  
nu traget for die rosen. diu wafen an der hant.  
for schapel wol gesteinet. die lichten helme goot.  
sit wir so wol erchennen. der argen Chriemhilde mvot.

Wir muosen hiute striten. das wil ich ir sagen.  
ir solt for siden hende. die lichten prouenne tragen.  
vnt for die tiefen mäntil. die vesten schilde wit.  
ob iemen mit ir zorne. das ir vil werliche sit.

Mine vil lieben herren. dar zo mage vnt man.  
ir solt vil willechliche. zo der chirchen gan.  
vnt chlaget got dem richen. forge vnt iwer not.  
vnt wizzet sicherlichen. das vns nahet der tot.

Irn solt ovch niht vergezen. swaz ir habt getan.  
vnt solt vil vlegeliche. da gegen gote stan.  
ir solt sin gewarnet. recken also her.  
ez enwelle got von himele. ir vernemt messe nimmer mer.



Sos giengen zu dem monster. die forsten vnt ir man.  
vf den vronen chirchhof. do hiez si stille stan.  
Hagene der chvone. daz si sich schieden niht.  
er sprach iane weiz noch niemen. waz von den Honen uns geschihit.

Leget mine frivnde. die schilde for den fuoz.  
vnt geltet ob in iemen. biete swachen groz.  
mit tiefen verch wunden. daz ist Hagene rat.  
daz ir so werdet fonden. daz ez in lobelichen stat.


Volker vnt Hagene. die zwene giengen dan.  
for daz monster. daz wart durch daz getan.  
daz sie daz wolden wizen. daz des kuniges wip.  
mit in da muose dringen. ia was vil grimmech ir lip.

Do chom der wirt des landes. vnt ooch sin schone wip.  
mit vil richem gewande. gezieret was ir lip.  
der rechen genwoge. die man sach mit ir varn.  
do chof man hohe stovben. von der kuniginne scharn.

Do der kunic Gele. alsos gewaffent sach.  
die rechen von dem Rine. wie balde er do sprach.  
wie sihe ich frivnde min. vnder helmen gan.  
mirst leit vf mine triwe. vnt hat in iemen iht getan.

Ich sol in gerne bozen. swie si dunchet gvot.  
hat iemen in beswäret. daz herce vnt ooch den muot.  
des bringe ich si wol innen. daz ez mir ist vil leit.  
swie si mir gebietet. des bin ich alles in bereit.

Do sprach von Tronege Hagene. vns hat niemen niht getan.  
ez ist site miner herren. daz si wafent gan.  
zallen hochgeciten. ze vollen drien tagen.  
het vns iemen iht getan. wir soldenz in billiche sagen.



Wol hort die kuniginne. was Hagene sprach.  
wie rehte vintliche. si im vnder dougen sach.  
sine wolde doch niht melden. die site von ir lant.  
swie lange si sie da heime. mit freuden hete bechant.

Swie grimme vnt och swie starche. si in dient wære.  
het iemen gesaget Ezelen. die rechten mære.  
er het iz vnderstanden. daz niht da wære gescheln.  
si liezen durch ir obermoot. daz sis im wolden niht veriehn.


Do gie die kuniginne. mit grozer menege dan.  
done wolden dise zwene. idoch niht hoher stan.  
drier trite breiter. daz was den honen leit.  
ia wuse si sich dringen. mit den degenen gemeit.

Die Ezeln kamerære. doohte daz niht goot.  
ia heten si den rechen. erzornet do den moot.  
wan daz sine torsten. vor dem kunige her.  
da was vil michel dringen. vnt doch niht anders mer.

Do man da gote gediente. vnt da si wolden dan.  
do chomen da zen rossen. vil manie honen man.  
och was bi Chriemhilde. vil manie schonio mit.  
wol sibent tosent degene. bi der kuniginne reit.

In des sales venster. Chriemhilt gesaz.  
mit maniger schonen frowen. mit freuden ane haz.  
Ezele der riche. gesaz och zo zir nider.  
vnt sahen kurcewile. von den goten rechen sider.

No was och in der marschalch. mit den rossen chomen.  
Danchwart der snelle. er het zo zim genomen.  
sinf herren ingesinde. von Bregonden lant.  
die ros man wol gesatelet. den ellenden rechen vant.



Do si zen rossen chomen. die kunige vnt ir man.  
Volker der chvne. raten do began.  
si solden bohydieren. nach ir landes siten.  
des wart von degenen. sit vil herlich geriten.

Vof den hof vil witen. chom do manic man.  
Ezele vnt Chriemhilt. ez sahen alles an.  
der bohyrt vnt schallen. diu beidiv wrden groz.  
von kristen vnt von heiden. wie luzzil iemen da verdroz.


Vf den buhurt chomen. al zehant geriten.  
die Dietriches rechen. in hochverteklichen siten.  
si wolde kurcewile. mit den gesten han.  
do enwolde erf in niht gvnnen. ir herre hiez siz balde lan.

Mit Gunthers mannen. das spil er in verbot.  
er vorhte siner degene. des gie im groziu not.  
do chomen von Bechelaren. die Kudegeres man.  
dar umbe do der edele. starche zornen began.

Er chom zuo zim vil balde. gedrongen durch die sehar.  
vnt sagete sinen degenen. si waren des gewar.  
das in vnnvte waren. die Gunthers man.  
ob si den bohyrt liezen. das ware im liebe getan.

Do sich die von in schieden. als vns ist geseit.  
do chomen da von Doringen. helde vil gemeit.  
vnt die von Tenemarchen. wol tosent chvner man.  
von stichhen sah man vliegen. vil der troonzvne dan.

Gawart vnt ovch Irnfrit. gefellechliche riten.  
des waren die von Rine. inhochvertiklichen siten.  
si boten manige tioste. den von Doringen lant.  
des wart von stichen dvrchel. vil manic herlicher rant.



Do chom och zu dem schalle. der herre Blödelin.  
mit tusent finer rechen. die taten da wol schin.  
wie si riten chonden. sich hvop groz vngemach.  
Chriemhilt ez vil gerne. dvrch leit der Buregonde sach.

Si gedaht inir mwote. als ez was nach geschehn.  
geschähe iemen von in leide. so möhte ich mich verfehn.  
daz ez erhaben wrde. an den vienden min.  
wrde ich wol errochen. des wolde ich gar an angest sin.


Schrovotan vnt Sibeche. vf den buhprt riten.  
Hornboge vnt Ramunch. nach Hunischen siten.  
si hielten gein den helden. v3 Buregonden lant.  
die schefste dräten hohe. mit chresten for des sales want.

Swes da iemen pflege. so was ez niwan schal.  
man horte von schilde stozen. palas vnt sal.  
harte lvot erdiezen. von Gunthers man.  
den lop daz sin gesunde. mit grozen eren da gewan.

Do was ir churcewile. so lanc vnt och so groz.  
daz dvrch die chovertivre. der blanche sweiz do vloz.  
von den vil goten marchen. die di helde riten.  
si svohnten an den Hunen. invil hochwertlichen siten.

Do sprach der videläre. Volker der chone man.  
ich wen vns dise rechen. torren niht bestan.  
ich hort ie sagen märe. daz si vns trogen haz.  
wne chondes sich zerwerlde. zware nimmer svogen baz.

Zen herbergen svoren. sprach der kuncz her.  
sol man nu di möre. vnde riten danne mer.  
gegen abende. so des wirdet eit.  
was ob div kuniginne. lop den vnhunden git.



Do sahen einen riten. so waigerlichen hie.  
daz ez al der Hünen. tet deheiner nie.  
ia mohter inden venstern. wol haben hercen tvot.  
er was so wol gechleidet. sam ein vil werden ritters brot.

Do sprach aber Volker. wie möhte ich daz verlan.  
iener tvot der frowen. mo; eine gebvze han.  
daz chunde niemen wenden. ez get im an den lip.  
iane rvoche ich ob ez zorne. des kunie Ezeln wip.


Nein durch mine liebe. sprach der kunec san.  
ez wizzent vns die lute. ob wir si bestan.  
ir lat ez heben die Hünen. daz foget sich noch baz.  
dannoch der kunec Ezele. bi der kuniginne saz.

Ine mag es niht gelazen. sprach do Volker.  
den bohrt reit er widere. mit vollechlicher ger.  
stach er dem richen heiden. daz sper durch sinen lip.  
daz sah man sit beweinen. beide maget vnt wip.

Do rvochte horteckliche. Hagene nach im dan.  
mit sehlich finer degene. riten er began.  
nach dem videläre. da div tiost geschach.  
Ezel vnt Chriemhilt. ez bescheidenliche sach.

Done wolden ovch die kunige. den ir spileman.  
bi den vianden. niht ane helfe lan.  
da wart von twsent heleden. vil chunsteklich geriten.  
si taten daz si wolden. in vil hochwertlichen siten.

Da der riche Hüne. ze tode was erslagen.  
man horte sine mage. weinen vnt klagen.  
do vragt al daz gefinde. wer hat ez getan.  
do sprachen die daz sahen. daz hat der starche spileman.



Nach swerten vnt nach schilden. riefen da zehant.  
des marcgraven mage. von der Hponen lant.  
do wolden si den spileman. ze tode erslagen han.  
der wirt v3 eime venster. fere gahen do began.

Do hoop sich von den loten. allenthalben schal.  
die Guntheres rechen. erbeisten oberal.  
div ros zervecke stiezen. die kunige vnt al ir man.  
do chom der kunic Ezele. der helt ez schaiden began.

Ein des Hponen mage. den er da bi im vant.  
ein vil starchez wafen. bracher im v3 der hant.  
do slogers alle widere. wan im was vil zorn.  
wie het ich minen dieneft. an disen heleden verlorn.


Ob ir no disen spileman. het darvumbe erslagen.  
ich hiez ouch alle hahen. daz wil ich iw sagen.  
ich sah vil wol sin riten. do er den Hponen slach.  
deiz ane sinen willen. von eime streche geschach.

Ir muozet mine geste. vride lazen han.  
do wart er ir geleite. div ros div zoch man dan.  
zu den herbergen. si heten manigen knecht.  
die in zedienste waren. mit allem vlize gerecht.

Der wirt mit sinen frivnden. inden palas gie.  
zorn er mer dcheimen. da niht werden lie.  
do rihte man die tische. daz wazzer man in trooc.  
do heten die von Rine. viende da genvoc.

Swie leit ez Ezeln wære. gewafent manige schar.  
sach man nach forsten dringen. vnt wol zevlize gar.  
da si zen tischen giengen. durch der geste haz.  
ir mach si rechen wolden. ob sich gefogen chunde daz.





Sit ir gewafent gerner. ezet danne bloz.  
sprach der wirt des landes. diu vnzucht ist zegroz.  
swer aber minen gesten. hie toot deheiniv leit.  
ez get im an sin hovbet. daz sie in Gunen geseit.

E' die herren gefezzen. daz was harte lanch.  
diu Chriemhilde forge. si al zesere twanc.  
si sprach herre Dietrich. ich soches dinen rat.  
helfe vnt genade. min dinch mir angefliehen stat.


Do sprach for sinen herren. Hildebrant der ellens rich.  
swer sleht die Nibelunge. der toot ez ane mich.  
durch deheines schazzes liebe. ez mag im werden leit.  
sie sint noch vnbetwungen. die snellen degene gemeit.

Si sprach ia hat mir Hagene. also vil getan.  
er morte Sivriden. den minen lieben man.  
der in v; den andern schiede. dem wär min golt bereit.  
engoltles ander iemen. daz wär mir inneklichen leit.

Do sprach meister Hildebrant. wie chunde daz geschehn.  
daz man in bi in sluge. ich lieze iwch daz geschn.  
ob man den helt bestunde. sich hobe liht ein not.  
daz arme vnt riche. dar umbe musen ligen tot.

Do sprach in sinen zechten. dar zuo her Dietrich.  
die bete la beliben. kuniginne rich.  
mir habent dine mage. der leide niht getan.  
daz ich die edeln degene. mit strite welle bestan.

Diu bet dich luzzel eret. vil edeles forsten wip.  
daz du dinen magen. rätst an den lip.  
si chomen vf genade. her indisse lant.  
Sivrit ist vnerrochen. von der Dietriches hant.



Do si an dem Bernäre, den willen niht erwant,  
do lobtes also balde, an Blödelines hant,  
eine wite marche, die Rodonch e' besaz,  
sit do vloog in Danchwart, daz er der gabe gar vergaz.

Si sprach du solt mir helfen, herre Blödelin,  
ez sint indifem huose, die viande min,  
die Siuriden slogen, den minen lieben man,  
der mir daz hilfet rechen, dem bin ih immer vndertan.


Des antwrt ir Blödel, da er bi ir saz,  
iane getarre ich dinen magen, geraten cheinen haz,  
wande si min brooder, bi im gerne siht,  
ob ich si bestunde, der kuncz vertroge mir sin niht.

Reyna herre Blödel, ich bin dir immer holt,  
ia gib ich dir dar umbe, min silber vnt min golt,  
vnt eine schone frowen, daz Rodonges wip,  
so mahtv gerne troten, den ir vil minneklichen lip.

Daz lant zu den burgen, soltu haben dir,  
vil tiurlicher reche, du solt geloben mir,  
daz ich dich sicherliche, alles des gewer,  
daz ich dir hie benennet han, ob du leistes mine ger.

Do der herre Blödel, die miete vernam,  
vnt daz im dorch ir schone, div frowe wol gezam,  
mit strite wander dienen, daz minnekliche wip,  
dar umbe moosen rechen, mit im verliesen den lip.

Er sprach man sol geswigen, der rede vberal,  
e' man is werden inne, so heb ich einen schal,  
ez muoz arnen Hagene, swaz er iv hat getan,  
oder ich wil dar umbe, minen lip verlorn han.



No wafent ouch sprach Blödel. alle mine man.  
wir soln den vianden. inir herberge gan.  
des wil mich niht erlazen. das Ezeln wip.  
dar umbe soln wir degene. alle wagen den lip.

Do die kuniginne. Blödelinen lie.  
indes strites willen. ze tische si do gie.  
mit Ezele dem kunige. vnt ouch mit sinen man.  
si hete swinde räte. an die geste getan.


Wie si zetische gienge. das wil ich io sagen.  
man sach da kunige riche. chrone vor ir tragen.  
vil manigen hohen forsten. vnt manigen werden degn.  
die sah man grozer zohte. vor der kuniginne pflegen.

Der wirt der schuf den gesten. den sedel vberal.  
den hohsten vnt den besten. zo zim in den sal.  
den christen vnt den heiden. ir spise er vndersehiet.  
man gab genvoc in beiden. als ez der wise kunec beriet.

Ir ander ingesinde. zen herbergen azen.  
den warn trohsazen. ze dienste lazen.  
die wofen ir spise. wol zevlize pflegen.  
ir wirtschafft vnt ir freude. wart sit mit iamer widerwegen.

Do die forsten gesezen. warn vberal.  
vnt no begonden ezzen. do wart in den sal.  
getragen zo den sversten. das Ezeln kint.  
da von der kunec riche. gewan vil starchen iamer sint.

Dar giengen an der stonde. vier Ezeln man.  
si trovogen Ortlichen. den iongen kunec dan.  
zo der forsten tische. da ouch Hagene saz.  
des wofis kint ersterben. durch sinen mortlichen haz.



Do der kunich riche. sinen svon ersach.  
zwo sinen chonemagen. er goetliche sprach.  
nu seht ir frivnde mine. diz ist min einech svon.  
vnt ovch iwer swester. der magiv noh vil dienste toon.

Gevehter nach dem chonne. ern wirt ein kone man.  
rich vnt ovch vil edele. starch vnt wolgetan.  
leb ich deheine wile. ich gib im drizzech lant.  
so magiv wol gedienen. des iungen Ortliebes hant.


Dar umbe ich bite gerne. ovch lieben frivnde min.  
swenne ir zelande widere. ritet an den Rin.  
so solt ir mit iv foren. den iwern swester svon.  
vnt solt ovch an dem kinde. vil genädekliche toon.

Ziehet in zen eren. vnz er werde ze man.  
hat iv inden landen. iemen iht getan.  
daz hilfet er iv rechen. daz habt vf minen lip.  
die rede hort ovch Chriemhilt. des kunec Ezeln wip.

Im solden wol getrowen. dise degene.  
gewhser zeinem manne. so sprach Hagene.  
doch ist der kunec ionge. so veicklich getan.  
man sol mich sehen selten. zehove nach Ortliebe gan.

Der konich Hagenen an blichte. im was div rede leit.  
swie niht dar umbe en redete. der forste vil gemeit.  
ez betrovebte im sin herce. vnt beswart im den mvot.  
do was der Hagenen wille. niht zekurcewile goot.

Ez tet den forsten allen. mit dem kunige we.  
daz Hagen von sine kinde. het gesprochen e.  
daz siz versizzen solden. daz was in vngemach.  
sine wessen niht der mäere. was von dem rechen sit geschach.



Gnoye di ez horten. vnt im doch warn gram.  
in heten gerne bestanden. och het der künec alsam.  
getorster von sinen eren. so wär ers chomen innot.  
sit tet im Hagene mere. er sloogen vor sinen oygen tot.

